

Dithero tsa Tirelano mo Kutlwanong

Thero ka Sontaga 2 morago ga moletlo waEpifania, e le ka 15. 01. 2012
08/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 84 -78/81
2. **Thapelo:** Lebogang MORENA, lo bitse leina la gagwe, lo bolelele ditiro tsa gagwe mo gare ga batho. Opelang fa pele ga gagwe, lo mo opelele, lo bue ka ga dikgagamatso tsotlhe tsa gagwe. Lo dudueletse leina le le boitshepo la gagwe. Amen.
3. Epistolo ka fa thulaganyong ya 2 e kwadilwe mo go Baroma 12:4-16;
Efangele ka fa thulaganyong ya 1 e kwadilwe mo go Johane 2:1-11.

4. A go ipolelwe tumelo ya bokeresete!

5. Sefela sa 261 - 243/253

6. Thapelo ya mmadi wa thero.

7. **Epistolo** ka fa thulaganyong ya 4 e kwadilwe mo go

1 Bakorinthe 2:1-10, e re: "Bakaulengwe, le nna e rile ke tla koo go lona, ka feta ka lo bolelela tshupo ya Modimo, e seng ka mafoko a a gaisang le e seng ka botlhale jo bogolo. Gonne ke ne ke sa ikaelela go lo itsise sepe, fa e se Jesu Keresete fela, ene yo o bapotsweng. Le gona ke ne ke le mo go lona ka bokoa le poifo le thoromo e kgolo. Gape, thuto ya me le thero ya me ga di a ka tsa dirafala ka mafoko a a kgonang ka botlhale, mme e ne e le ka tshupo ya Mowa le ya thata, gore tumelo ya lona e se ka ya ema ka botlhale jwa batho, mme e eme ka thata ya Modimo. Le gale botlhale re a tle re bo bue mo go ba ba botlalo; mme ga se botlhale jwa lefatshe leno, le e seng jwa balaodi ba lefatshe leno ba ba nyelelang. Mme re bua botlhale jwa Modimo jo e leng bosaitsweng, jo bo fitlhegileng, jo Modimo o sa leng o bo rulaganya pele dipaka di ise di nne teng go re isa kgalalelong, jo bo neng bo sa itsiwe ke ope wa balaodi ba lefatshe leno; gonne fa ba ka bo ba bo itsile, ba ka bo ba sa bapola Morena wa kgalalelo. Mme go ntse jaaka go kwadilwe ga tse: 'Tse leitlho le sa di bonang, tse tsebe e sa di utlwang, tse di sa tsenang mo pelong ya motho, ke tsona tse Modimo o di baakanyeditseng bone ba ba o ratang.' Mme Modimo o di re senoletse ka Mowa wa ona; gonne Mowa o tlotlhomisa dilo tsotlhe, le tse di boteng tsa Modimo." Amen.

8. Thero: Phuthego e e rategang ya Morena wa rona Jesu Keresete, moapostolo o gopotsa ba kwa Korinthe ka fa a tlileng ka teng mo go bone, fa a ne a ba tlisetsa Efangele, a re: "Bakaulengwe, le nna e rile ke tla koo go lona, ka feta ka lo bolelela tshupo ya Modimo, e seng ka mafoko a a gaisang, le e seng ka botlhale jo bogolo." A re gopoleng gore Paulo e ne e le morutegi, a na le thuto e kgolo, a itse le tsa botlhale jwa lefatshe. Mme a di tlogela gore a hume Keresete. A tlogela tsotlhe, gonne thata e teng, e e ratang go dira mo go ene, jaaka re utlwa ka temana ya 4 e e reng: "Gape, thuto ya me le thero ya me ga di a ka tsa dirafala ka mafoko a a kgonang ka botlhale, mme e ne e le ka tshupo ya Mowa le ya thata, gore tumelo ya lona e se ka ya ema ka botlhale jwa batho, mme e eme ka thata ya Modimo." Ka ntlha ya thata eo a lemoga bokoa jwa gagwe, a boifa, a roroma. Paulo a tihaloganya gore tsotlhe tse motho a nang le tsona ga di na go mo pholosa, le fa ene ka nosi, le e seng yo mongwe. Ga a ka a rera ka mafoko a botlhale, gongwe a go tsietsa, gonne o ne a batla gore Evangele e dire ka ditshupo tsa Mowa.

Barategi mo Moreneng, Bagerika ba ne ba batla botlhale, mme mopostolo o a ikemisetsa gore a se ka a rata go tshwara batho fela ka mafoko a a itumedisang. Lefoko la kajeno le re: Ga a itse sepe mo gare ga bone, fa e se Jesu Keresete yo o bapotsweng mo sefapaanong. Ke a itse gore molaetsa oo ke bosilo mo go bangwe ba bagaetsho, mme ke a itse gore thata ya Modimo e dira ka ona. Ka moo tumelo ya rona ga e eme ka botlhale jwa motho, mme e eme ka botlhale jwa Modimo. Ke nnete: Lefatshe ga le itse Modimo ka botlhale jwa lona, mme go molemo, fa Modimo o pholosa badumedi ka bosilo jwa thero.

A re se ka re thibela Mowa o o Boitshepo, le thata ya ona, re se leke ka thata, gongwe ka botlhale jwa rona go gogela batho mo go Keresete. Go botlhofo thata go ikanya botlhale jwa rona, fa re re: Re tlhalefile. Gopola gore Mowa o o Boitshepo o dira ka thata ya ona, e seng ka ya motho, gongwe ka botlhale jwa gagwe. Re tshwanetse go dira ka tsa Mowa wa Modimo, Ke tshwanelo gore re ngotlafale, re se thibele, le e seng go nyatsa tiro ya ona gore re se ipatlele batho ba ba tla re latela bogolo go Modimo.

Mowa o o Boitshepo o bua tsa ga Keresete. Batho ka bobona ba bua tsa ga gabo ka botlhale jo bo sa tsamaelaneng le Mowa wa Modimo. A re utlweng Mowa wa Modimo, re se thibe, re ipolele go bidiwa le go sedimosediswa ke ona, ke raya ka tumelo e re direlang Modimo ka yona. Mowa wa lefatshe ga o ka ke wa re gorosa gope. Botlhale jwa Mowa wa Modimo bo re tsweledisa mo tseleng e e yang mo botshelong jo bo sa khutleng. Mowa wa lefatshe o tla re gorosa mo lefifing, mo losong, mo moleteng wa molelo. Ba ba gogiwang ke Mowa wa Modimo ke bana ba ona. Ba ba gogwang ke mowa wa lefatshe, jwa wa ga Satane ke bana ba ga Satane. Wena motho wa Modimo, tlogela botlhale jwa gago, mme o rere Evangele ya Morena Jesu!

Paulo a re: O dirile jalo ka ntlha ya gore go na le botlhale jo e seng jwa sebaka seno, a re: Ka ene lo mo go Keresete Jesu yo o dirilweng go nna botlhale jo bo tswang mo Modimong le tshiamo, le boitshepiso, le kgololo. Ke yona botlhale jo bo tswang mo Modimong, le go farologanya le jwa lefatshe. Paulo a re: Go buiwa fa gare ga ba botlalo fela. Go na le masaitsiweng mo kgannyeng ya tumelo e re sa ka keng re di utlwa, fa re le bana ba bannye mo tumelong. Re na le tse dintsi tse re ka di buang ka tse di bokete go tlhalosiwa, gonne ditsebe di paletswe ke go reetsa le go utlwa. Kana yo o sa ntseng a anya mašwi ga a ise a tlhaloganye sepe sa Lefoko la tshiamo, gonne o sa ntse a le lesea, mme yo o jang tse di loileng ke ka go gola, ba re: Ba tlwaeditswe go dirisa tlhaloganyo, go ka farologanya tse di molemo le tse di bosula, Baheb. 5:11-15.

Bagaetsho ba bantle mo Moreneng, ke nyatsego e e maswe tota go bona modumedi yo o sa goleng. O mo kotsing ya go boela kwa morago. Botlhale jo bo fitlhegileng bo mo go bone ba ba tlhoafetseng go eletsa go ithuta Lefoko la Modimo gore ba gole, ba rute le ba bangwe. Peto a re: “Lo eletse mašwi a Lefoko a a sa pekwang, jaaka bana ba e leng gona ba tsalwang, gore lo tle lo golele pholosong ka ona, fa lo lemogile gore Morena o pelontle,” 1 Petr. 2:2-3

Efangele yotlhe e senotswe ke Modimo ka Mowa o o Boitshepo wa ona. Ga go na motho yo o neng a kgona go e bona le go lemoga kgang ya pholoso ka tlhaloganyo ya gagwe, ka e le bosaitsiweng jo bo senotsweng. Reetsa Mowa wa Modimo. O go laletsa go utlwa Lefoko la ona, fa go rerwa Efangele, fa go abelwa disakaramente mo ponatshegong ka thulaganyo e e supang gore ke ka ntlha ya eng, fa mokolobediwa a kolobediwa, le gore molalediwa o abelwang mo selalelong, fa a abelwa mmele wa ga Keresete, le madi a gagwe go itshwarelwa maleo a gagwe. Mme ga se botlhe ba ba nang le ditsebe tsa go utlwa lentswe la Mowa o o Boitshepo. Ga se botlhe ba ba nang le matlho a go bona tsa Modimo, fa go abelwa mo go tsona dikabelo tsa boitschwarelo, le botshelo jo bo sa khutleng. Ba tshwerwe ka tsa lefatshe, ba kgotshofadiwa ke tse di felang fela, ba latlhegelwa ke tse di sa khutleng. Rera Efangele e e nang le botlhale, le go tsamaelana le sefapaano sa ga Keresete, le lorato la Modimo gore re pholosiwe ka go dumela mo go Keresete, le fa re le ba morafe ofe. Morena o batla gore merafe yotlhe e dirwe barutwa ba gagwe.

Modimo o re tlhotlheletsa gore re kope Mowa wa boammaaruri mo Modimong. Re gopole ka metlha gore Motho wa tlhago ga a amogele tsa Modimo, ga a ka ke a di tlhaloganya, gonne di senolwa ke Mowa. Ka ntlha ya bopelontle jwa ona le ka bopelotlhomogi jwa ona Modimo o re atamela gore re romelwe badiredi ba Lefoko la ona, ba re rerele Efangele e e boitshepo ya ga Jesu Keresete. Mowa o o Boitshepo o rata go dira, le go dirafatsa ka yona mo go rona gore re tlhabologe, re dumele, re dirwe ba bašwa, gore a tshube lesedi la tumelo mo go rona ka thero, le go tsalwa sešwa ka Lefoko la ona. Tumelo le tse di ratiwang ke Modimo ke dikabelo le ditiro tsa Mowa o o Boitshepo. Tse tsolthe tseo di re gogela mo didirising tsa bopelotlhomogi. Ke ka tsona, fa Mowa o o Boitshepo o rata go simolola le go dirafatsa tsa tumelo mo go rona. A re gopoleng gore ke bolelo jo bo maswe go thibela, le go latofatsa tiro eo ya Mowa o o Boitshepo o o ratang mo go kalo go dira mo rona, le go re thusa ka Efangele ya ga Keresete. Amen.

9. Thapelo: Batlang Morena le thata ya gagwe, lo batlisisa sefatlhego sa MORENA, Modimo wa rona. Dikatlholo tsa ona di bonala mo lefatsheng lotlhe. Amen.
Thapelo ya Morena: Rara wa rona yo o mo legodimong ...

10. Sefela sa 86 - 80/83

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. Mkhabela, ka ngwaga wa 2011.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.